




9 МАМЫР — ҰЛЫ ЖЕҢІС КҮНІ

ҚЫМБАТТЫ СОҒЫС ЖӘНЕ ТЫЛ АРДАГЕРЛЕРІ!

Құрметті аудан тұрғындары!
Сіздерді Ұлы Отан соғысындағы Жеңістің 72 жылдығымен шын жүректен құттықтаймын!
Адамзат тарихындағы қанқұйлы оқиғалардың бірі болып саналатын Ұлы Отан соғысы біздің халқымыздың, әкелеріміз бен аналарымыздың биік рухын, ерлігі мен қаһармандығын барша әлемге дәлелдеп берді. Осы соғыста төндессіз ерліктерімен фашизмді тізе бүктіріп, Жеңіс күнін әкелген бабаларымыздың ерлігін ұрпақтары мәңгілікке жадында сақтайды.

Бұл қастерлі мереке аталарымыздың жанқиярлық ерлігі мен төгілген қанының өтеуі, қаһарман қайсарлықтың хас үлгісін көрсеткен қайтпас рух пен жалынды жігерлерінің жемісі. Олар албырт жастықтың қызықты шақтарының орнына өмір мен өлім алысқан зұлм соғысты көріп, өлшенбес ерліктің, Отан алдындағы адалдық пен азаматтық парызды атқарудың өнегесін көрсетті. Олардың ерен ерліктері ұрпақ алдында мәңгі жаңғырып жасай бермек.

Біздің ауданымыздан да Ұлы Отан соғысына жеті мыңнан астам азамат аттанып, олардың үш жарым мыңы туған жерге оралмады. Майданға азық-түлік, киім-кешек, басқа да қажетті заттарды жеткізу үшін қаншама аналарымыз бен буыны қатпаған балалар тылда еңбек етті. «Бәрі де майдан үшін, бәрі де Жеңіс үшін!» деп ұрандатқан тыл еңбеккерлері де жауынгерлермен бірдей арпалысты. Бұл күнде бейбіт заманда ғұмыр көшіп, ұрпақ өрбітіп отырғанымыз және болашағымызға сенімді түрде қарайтынымыз үшін оларға алғысымызды арнаймыз. Олар қандай кезеңде де бізге қолқабыс болып, қоғамдық өмірге және жастар тәрбиесіне белсене қатысады. Аға ұрпақтың мұң-мұқтажын ұмытпау және олардың тұрмысын лайықты қамтамасыз ету үшін қолдан келгенің бәрін жасау — біздің қасиетті парызымыз.

Қадірлі жерлестер!
Баршамыз үшін қасиетті осы мерекеде Сіздерге мықты денсаулық, рух сергектігін, амандық-саулық және мейірім шуағын, ұзақ та бақытты ғұмыр тілеймін! Мереке құтты болсын!

Аудан әкімі Бауыржан ҚАНИЕВ.

ТҮЙІНДІ
СӨЗ«Ерлік білектен
емес, жүректен»

ТАҒАЙЫНДАУ



Шалқар ауданының әкімі Б.Н.Қаниевтің 2017 жылғы 27 сәуірдегі №188 өкімімен Алмас Бақытқалиұлы Сүлеймен «Шалқар аудандық мәдениет және тілдерді дамыту бөлімі» мемлекеттік мекемесінің басшысы болып тағайындалды.

А.Б.Сүлеймен осы қызметке тағайындалғанға дейін Шалқар қаласындағы Қазанғап Тілепбергелулы атындағы саз мектебінің директоры қызметін атқарған.



ДӘРІГЕРЛЕР АРДАГЕРЛЕР ДЕНСАУЛЫҒЫН ТЕКСЕРДІ

Ұлы Отан соғысы және тыл ардагерлеріне мереке қарсаңында қандай құрмет көрсетілсе де артық болмайды. Үлкендерді құрметтеуді әрдайым алға қоятын аудандық орталық емхана дәрігерлері 9 мамыр — Жеңіс күні мерекесі қарсаңында жылдағы жоспары бойынша қаламыздағы Ұлы Отан соғысының майдангерлері мен тыл еңбеккерлерінің үйлеріне барып, мерекелерімен құттықтады. Ақ халатты абзал жандардың құрамында Сәндеш Нұрәлима, Гүлжайнар Абилова, Алма Есенғазиева, Гүлсайран Бекжанова, Гүлмира Есжанова, Гүлнар Шакеева, Назерке Калина, Айгерім Ұзақова, Гүлжайнар Көрпебаевалар бар.

Дәрігерлер алдымен жасы 90-нан асқан Ұлы Отан соғысының ардагері Шудабай Тақаевтың шаңырағына ат басын тіреді. Жасы ұлғайса да соғыс ардагері

Шудабай Тақаев патриоттық негізде құрылатын аудандағы түрлі мәдени шаралардың басы-қасынан ешқашан қалыс қалған емес. Ал үйіне келген дәрігерлерге ол денсаулығы жөнінде шағым айтқан жоқ. Қосағы Бәдігүл әже екеуі бір шаңырақтың алып бәйтерегі іспетті. Ақ халатты абзал жандар олардың денсаулығын тексеріп, алғашқы дәрігерлік көмек құралдары салынған сөмкені сыйға тартты. Мереке қарсаңында мұндай сый-құрметке ардагерлер дән риза болды.

Бұдан соң дәрігерлер қаламыздағы Ұлы Отан соғысының ардагері Таңжарық Жұмабаевтың, соғыс ардагерінің жесірлері Алмажан Сәдібекова, Биша Еспанова, Бибіш Көбенова, Кафия Гомарова, Назия Шоқаннның үйлеріне барып, жоғарыдағы аталған қызметтері мен сый-құрметтерін көрсетті.

Дәулет ДОСҚАЛИЕВ.

МЕРЕКЕ КҮНДЕРІНДЕГІ ІС-ШАРАЛАР

9 мамыр — Ұлы Жеңістің 72 жылдығына орай ауданның білім бөлімі және жастар ресурстық орталығының ұйымдастыруымен қаламызда «Мәңгілік полк» шеруі өткізіледі. Аталған акция барысында қала тұрғындары, жастар, мектеп оқушылары Ұлы Отан соғысына қатысқан аталары мен әжелерінің А3, А4 форматтағы портреттерін алып,

қала көшелерімен жүріп өтеді. Осыған орай, ардагер бабаларының ерлігін ұлықтағысы келген ұрпақтарын «Мәңгілік полк» шеруіне қатысуға шақырамыз. Шеру 9 мамыр күні 8.00-де М.Шыманұлы ескерткіші жанынан басталады. Қосымша мәліметтерді 23-0-73 телефонына хабарласып біле аласыздар.

* * *

Қазақстан Қарулы Күштерінің құрылғанына 25 жыл толуына орай 5 мамыр күні 10.00-де Есет Көтiбарұлы көшесiнде мектептің жоғарғы сынып оқушыларының және Шалқар аграрлық-техникалық колледж студенттерінің қатысуымен әскери-патриоттық жиын өтеді. Жиын соңы 11.00-де аудандық Мәдениет үйінде өтетін мерекелік концертке ұласады. Қала тұрғындарын аталған шараларды бірге тамашалауға шақырамыз.

Аудандық ішкі саясат бөлімі.

7 МАМЫР — ОТАН
ҚОРҒАУШЫЛАР КҮНІ

ҚҰРМЕТТІ ШАЛҚАРЛЫҚТАР!

Қаһармандық дәстүрдің жарасымды жалғасы іспетті 7 мамыр — Отан қорғаушылар мерекесі құтты болсын!

Бұл күн биыл құрылғанына ширек ғасыр толып отырған қарулы күштеріміздің мерейін асқақтатын тамаша мереке, Отан үшін отқа түскен ата-бабаларымыздың және болашақ ел қорғайтын асыл азаматтарымыздың мейрамы болып есептелетін бұл күн мемлекетіміздің болашағы үшін маңыздылығы жоғары, себебі әрбір қазақстандықтың ұлы да, құрметті міндеті — Отан қорғау. Отан қорғаушы бейнесі әрбір жас буын үшін ерлік пен патриоттықтың, батырлық пен табандылықтың, Отансүйгіштік пен Отанға шексіз қызмет етудің нышаны.

Халқымызда «Ер — елінің қорғаны» деген аталы сөз бар. Біз осындай жандардың ержүрек істеріне сай сый-құрмет көрсете отырып, олардан өнеге алып өсетін жас ұрпақ Отанына адал қызмет етеді деп сенеміз. Аға ұрпақ пен жас буынның Отанымызды қорғап, айтулы үлес қосқанын біз әрқашанда мақтан тұтамыз.

Бүгінде Отан қорғаушылар күні — өз Отанын қадірлеп, оның тарихын құрметтейтін, ерлік пен жауынгерлік күшке ие барлық ерлердің ортақ мерекесіне айналды.

Құрметті шалқарлықтар!
Баршаңызды батырлық пен ерліктің мерекесі болған — Отан қорғаушылар күнімен шын жүректен құттықтай отырып, шаңырақтарыңызға қуаныш, құт-береке, еліміздің дамуы жолындағы еңбектеріңізге табыстар тілеймін. Туған еліміздің іргесі бүтін, Тәуелсіздіктің көк байрағы биік, мәртебеіміз жоғары, еліміз аман, жұртымыз тыныш болсын, ағайың!

Аудан әкімі Бауыржан ҚАНИЕВ.

ҚАЗАҚСТАН РЕСПУБЛИКАСЫНЫҢ ҚАРУЛЫ КҮШТЕРІНЕ — 25 ЖЫЛ

АЙБЫНДЫ ӘСКЕР — ЕЛ ТІРЕГІ

1992 жылы 7 мамырда Қазақстан Республикасының Президенті Н.Ә.Назарбаевтың Жарлығымен құрылған Қазақстан Республикасының Қарулы Күштеріне биыл 25 жыл толып отыр. Бұл тарих үшін аз уақыт болғанымен қиындықтарға толы ұзақ мерзім. Қазақстан Қарулы Күштеріне қазіргі заман талабына сай жауынгерлік мүмкіндіктері зор ұтқыр әскер құру міндеті қойылды. Осы уақыт аралығында Қарулы Күштеріміз айбынды, алдыңғы қатарлы әскерге айналды. Мемлекет басшысы — Қарулы Күштердің Жоғарғы Бас қолбасшысы Нұрсұлтан Назарбаевтың сарабдал саясатының арқасында еліміздің қауіпсіздігі мен аумақтық тұтастығы қамтамасыз етілді.

(Соңы 2-бетте).

БІРЛІКТІ ПАШ ЕТКЕН ШЕРУ

1 мамыр — Қазақстан халқының бірлігі күні елімізде ұлттар достығы, татулығы әлемге паш етілді. Республикамыздың бір бөлшегі, өзіміздің Шалқар өңірінде де бұл достық пен бірліктің жарқын мерекесі үлкен көтеріңкі арқыл-күйде, өзгеше жағдайда сән-салтанатымен өткізілді.

Бейбіт шеруге жиналған қаламыздың еңбек, оқу орындарының ұжымдары ертеңгі сағат 9.00-ден бастап қаладағы Әйтеке би көшесінің бойына жиналып, шеруге бой түзеді. Бейбіт шерудің жоспары, мекемелердің колоннада жүру реті, оның жетекшілері күні бұрын ұжымдарға таратылғандықтан, барлығы да өте үйлесіммен өз міндетін атқарыпды.

Ал Есет Көтiбарұлы көшесінде сәнді шеруді тамашалауға жиналған халық көріністі асыға күтті. Сағат 10.00-ден бастап аудандық тарихи-өлкетану музейінің алдында орын тепкен үлкен сахна мінберінен аудан әкімі Бауыржан Қаниев еңбек ұжымдарының сән салтанатты шеруін қабылдады. Ел еңсесін көтерер өселі еңбекке шақырған транспаранттар, тулар, жалаушалар, шарлар көліктерге ілініп, қолмен көтеріліп, шеру ажарын аша түсті. Бас колоннаны еңбек ардагерлері, «Нұр Отан» партиясы аудандық филиалы және «Жас Отан» жастар қанаты, ауданның және қаланың «Құрметті азаматтары», «Жыл адамдары» бастады. Шерулетіп трибуна жаңынан өткен әр еңбек ұжымының жетістіктері, көрсеткіштері, еңбек озаттары барша қауымға дауыс күшейткіш арқылы естіліп тұрды. Сол жерде шерушілер әр ұлттың билерін билеп, татулық пен бірлікті дәріптеді.

Көрермен халық әр ұжымның жетістіктеріне қол соғып, рухын көтеріп тұрды. Міне, бірлік мерекесі осылай көңілдерге жақсы әсер сыйлап, көпшіліктің назарын өзіне аударды.

Қыдыралы ӘЛИН.

